

ԳՐԱԼՈՍՈՒԹՅՈՒՆ ԵՎ ՔՆՆԱԿԱՆՈՒԹՅՈՒՆ

ԳԻՐԲ 1917—1920 ԹԹ. ՀԱՅ ՊՈԵԶԻԱՅԻ ՍԱՍԻՆ¹

1917—1920 թվականների հայ պոեզիան, լինելով մեր ժողովրդի կյանքի ամենակրիտիկական շրջաններից մեկի յուրօրինակ գեղարվեստական արտացոլումը, մեծ հետաքրքրություն է ներկայացնում սովետահայ գրականագիտության համար: Նախ՝ որ այս շրջանի մեր պոեզիան քիչ ուսումնասիրված մի բնագավառ է և հետո՝ այդպիսի ուսումնասիրությունն ավելի քան անհրաժեշտ է նամանավանդ այն պատճառով, որ ուղղակի կամ անուղղակի բազմաթիվ փորձեր են եղել ժխտելու այդ տարիների մեր գրականության ակնհայտ արժեքները, բանն այնպես ներկայացնելով, թե իբր ժողովրդի հասարակական-քաղաքական կյանքում տեղի ունեցած մեծ հեղափոխումների այդ ժամանակաշրջանում «...լուել էին բոլոր հին գրողներու: Ամբողջ տարիներ ոչ մի արժեքավոր գործ հրապարակ չէր գալիս», իբրև թե «...գոյություն ուներ միմիայն նացիոնալիստական մոտիվների ականջ խլացնող թմբկահարություն»:

Հովհ. Ղազարյանը իր հավաքած հարուստ նյութի վերլուծությամբ հերքում է այս թյուր տեսակետները և օբյեկտիվորեն արժեքավորելով գրական արտադրանքը, փորձում է ի մի բերել 1917—1920 թվականներին հայ պոեզիայի ձեռք բերած նվաճումները: Աշխատության դրական կողմերից պետք է համարել այն, որ հեղինակը այդ տարիների մեր պոեզիան դիտում և քննարկում է ամբողջ հայ գրականության զարգացման ֆոնի վրա, այդ ամենը կապելով տվյալ ժամանակաշրջանի պատմական կոնկրետ իրադարձությունների հետ:

Հոկտեմբերյան սոցիալիստական Մեծ ռևոլյուցիան բախտորոշ նշանակություն ունեցավ Ռուսաստանի բոլոր ազգերի և ժողովուրդների, այդ թվում նաև հայերի համար: չարկված ու զրկված հայ ժողովուրդը միանգամից կողմնորոշվեց դեպի նոր Ռուսաստանը, ռևոլյուցիայի մեջ տեսնելով իր լավագույն իդեալների կենսագործումը. դարերով երապած փրկության ուղին: Ռևոլյուցիայի ազդեցության տակ էլ տեղի է ունենում նրա քաղաքական և գեղարվեստական հայացքների արմատական բեկումը:

Սկսվում է հայ գրականության և առանձնապես պոեզիայի պատմության ամենահետաքրքրական շրջաններից մեկը: Ռևոլյուցիան իր հուժկու դինամիկայով, իր հեղաշրջիչ և կենսահաստատ ուժով գրողներին մղում է ստեղծագործական նոր որոնումների: Ստեղծվում է մեր կլասիկ գրականության լավագույն տրագիկոսները շարունակող միանգամայն ինքնատիպ ու բազմաթանր, քաղաքականապես նպատակասլաց պոեզիա, ռևոլյուցիայի նվաճումները հաստատող, պայքարի կոչող, բողոքող մարտական պոեզիա, որ կրկին ու կրկին հաստատում է այն ճշմարտությունը, թե

¹ Հոգհ. Ղազարյան, հայ պոեզիան 1917—1920 թվականներին, ՆՍՍՐ ԳԱ հրատարակչություն, 1958 թ.:

Ժողովրդի քնարը Լրբեք

Ձի կարող ստեղծ...

Ռեուլյուցիայի բանաստեղծական արձագանքներն են ոչ միայն հայ պրոլետարական գրականության վետերանների, այլև մեր կլասիկայի կարկառուն գեմքերի այդ տարիների ստեղծագործությունները: Ամբողջովին ռեուլյուցիոն իրադարձություններով հարուստ այդ ժամանակաշրջանի ծնունդ են Ռումանյանի «Թագավորն ու շարչին», «Նվեր Վրաստանի բանաստեղծներին» ստեղծագործությունները, քառյակների մի զգալի մասը, Իսահակյանի «Սասմա Մհերը», Տերյանի ռեուլյուցիոն խոր լավատեսությամբ հագեցած քաղաքական լիրիկայի փայլուն նմուշները:

Ռեուլյուցիոն այս ժամանակաշրջանի արգասիք են Ա. Վշտունու արևելյան ժողովուրդների ռեուլյուցիոն դարձումները մարմնավորող երկերը, Չարենցի աշխատավորական մասսաներին ոգեշնչող, նրանց ազատասիրական զգացմունքներին ուղղված տվող ռեուլյուցիոն, մարտաշունչ պոեզիան:

Աշխատության մեջ առանձին գլուխներ են նվիրված Հովհ. Ռումանյանի, Ավ. Իսահակյանի, Վ. Տերյանի, Հ. Հակոբյանի, Շ. Կուրդինյանի, Ծ. Չարենցի, Ա. Վշտունու ստեղծագործություններին:

Հարգված է Իսահակյան բաժինը, ուր հեղինակն առանձնապես մանրամասն է խոսում «Սասմա Մհեր» վիպերգի մասին: Քննարկում է նրա վարիանտները, շեշտը դնում պոեմի զաղափարական նպատակասլացության վրա, ցույց տալիս, որ Իսահակյանը Մհերի մեջ մարմնավորում է ժողովրդի անխորտակելի ուժը, կենսունակությունը, աշխատանքի անսպառ եռանդը, նրա ազատատենչ ոգին և դարեր մշակած կենսափիլիսոփայությունը:

Առանձին բաժնում խոսվում է կոմունիստ գրողներ Հակոբ Կամարու, Սեյրիի, Ավագ Կոծինյանի, Խորեն Լոռենցի և ուրիշների ստեղծագործությունների մասին, ցույց տրվում, որ թեև զրանց մեծ մասը թույլ են իրենց արտահայտչական միջոցներով, բայց տոգորված են խոր լավատեսությամբ, ռեուլյուցիայի հաղթանակի նկատմամբ ունեցած անշեշ հավատով: Հեղինակն այնուհետև կանգ է առնում 1917—1920 թվականներին իրենց ստեղծագործական առաջին քայլերն անող մի շարք բանաստեղծների ստեղծագործությունների վրա, նշում է, որ նրանց մոտ թեև դեռևս չի զգացվում Հոկտեմբերյան ռեուլյուցիայի շունչը, և նրանք երգում են իրենց մերժված սերը, հայկական կոտորածներն ու զաղթը, երգում են պանդխտության սրտամորմոք երգերը, բայց այս ամենի մեջ կա նոր, պայծառ օրերի և խաղաղության բաղձանք, լավատեսական մի տրամադրություն, որ տիրական ու համակող ուժ է դառնում նրանց ստեղծագործության մեջ:

Գրական փաստերի վերլուծությունից հեղինակը եզրակացնում է, որ 1917—1920 թվականների հայ պոեզիան իր էությամբ ժողովրդային պոեզիա է, որը ներծծված է պրոլետարիատի դասակարգային պայքարի հաղթանակի հավատով, ժողովուրդների բարեկամության և խաղաղության զաղափարներով:

Վեր հանելով այս տարիների հայ պոեզիայի բնորոշ գծերը, Ղազարյանը փորձում է բացահայտել մեր հեղինակների արվեստը, նրանց բանաստեղծական խոսքն ավելի էմոցիոնալ ու նպատակասլաց դարձնող արտահայտչական միջոցներն ու հնարանքները: Սակայն երբևէ չափից ավելի ուշադրություն դարձնելով հարցի այդ կողմին, հեղինակն ընկնում է ճայրահեղությունների

մեջ: Աշխատության 76-րդ էջում Ղազարյանը պնդում է թե «Հոկտեմբերյան ռևոլյուցիայի օրերին փոխվում է Տերյանի ստեղծագործության նաև Հնչյունա-կան կառուցվածքը (այս և հետագա ընդգծումները մերն են — Ղ. Դ.), այդ ժա-մանակաշրջանում ստեղծված մարտաշունչ ու լավատեսական երգերում, պոե-տը հեռանում է թույլ ու մեղմ ձայնավորների (ու, ի), խուլ ու փակ բաղա-ձայնների (ս, մ, ն և այլն) գործածությունից և ավելի մղվում դեպի բաց ու պայծառ ձայնավորները (ա, օ), պայթող ու հնչեղ բաղաձայնները (դ, ղ, ջ և այլն):

Իսկ այս դրույթը հաստատելու համար նա բերում է բանաստեղծի հետևյալ քառաստորը:

Ջարդեցե՛ք անդուլ, անգութ, անխնա,
Ջնջեցեք աշխարհն ապական ու հին.
Թող քարը քարի վրա չմնա,
Ողջը մատնեցեք հրին ու մահին:

Ղազարյանը չի նկատում, որ հենց այստեղ Տերյանը ժխտում է իր բերած փաստարկը՝ միայն առաջին տողում գործածելով 4 ն:

Անհրաժեշտություն կա՝ արդյոք ասելու, թե այսպիսի պնդումը միանգա-մայն սխալ է ու զուրկ գիտական որևէ հիմքից: Այս կամ այն կոնկրետ պայ-մաններում կարող է փոխվել զրոգի բառապաշարը, դարձվածաբանությունը, բայց երբեք չի կարող փոխվել հնչյունական կառուցվածքը: Լեզվի հնչյունա-կան կառուցվածքը փոխվում է դարերի ընթացքում, աստիճանաբար, աննկա-տելի կերպով:

Ղազարյանը հնչյուններին վերագրում է ինչ-որ գաղտնի իմաստ, պնդելով թե բաց ու պայծառ ձայնավորները, պայթող ու հնչեղ բաղաձայնները լավա-տեսական, մարտական շունչ են հաղորդում Տերյանի ստեղծագործություննե-րին: Իսկ ինչ կասի նա, օրինակ դողդոջ բառի մասին, որը կազմված է հենց իր գովերգված հնչյուններից. ո՛րն է այստեղ «մարտական շունչը»:

Այս կարգի թերությունները մասնակի են Ղ. Ղազարյանի գրքում: Ընդհա-նուր առմամբ այն ճիշտ պատկերացում է տալիս 1917—1922 թթ. հայ պոեզիա-յի մասին:

Ղ. Դ. ԴԱՐԲԻՆՅԱՆ